

Joan Leslie cu buki na Biblioteca



ORANJESTAD (AAN): Na 1953 Joan Leslie a nace na Aruba y na un edad hopi hoben e tabata skirbi storia y poesia na Hulandes, Ingles y Papiamentu. Despues di termina su studio na Colegio Arubano el a sigui pa Hulanda. Durante e periodo di 1996 pa 2003 8 storia di dje cu ta contene aspectonan psicologico y humoristico, a keda publica den algun antologia Hulandes.

Na 2003 el a gana e prome premio den e competencia di

skirbimento di proza organiza pa 'Stichting Simia Literario' despues di cual el'a bira miembro di e grupo di skirbidornan. Di biaha el a bira hopi activo den tur e actividadnan cu e organizacion tabata organiza pa promove literatura Caribense na Hulanda, bou di cual tabata encera participacion na charla y organiza workshops.

Na 2004 'Stichting Simia Literario' a introduci e antologia 'Bentana Habri'

den cual dos storia di Joan a keda publica: 'Rosa h  l cu sumpi  a' y 'Diferencia mester tin'.

Na 2005, n'e ocacion di e celebracion di 50 a  a di statuut di Reino Hulandes, a keda publica den e coleccion di poesia "Met de wil elkander bij te staan" dos poesia di Joan titula: 'Voetsporen' y 'Verbondenheid'.

Di e tempo ei nan ta invit'e na Hulanda pa presenta na varios actividadnan literario; recientemente na November 2006 el a forma parti di e programma organiza pa biblioteca di Eindhoven pa cu e proyecto di e buki 'Dubbelspel' di Frank Martinus Arion. Na September di 2006 el a tuma parti activo organizando e celebracion di e prome lustro di 'Stichting Simia Literario'.

Su prome buki 'De bloeiende Flamboyant' a sali publica fin di februari 2007, pa e editorial "In de Knipscheer". E fascinacion cu e escritora tin cu e comportacion di hende den diferente situacion ta bini hopi dilanti den e 12 storia cortico di e buki. E storianan ta fiha 'riba diferente aspecto tanto cu ta tene'bo den suspenso, pone'bo hari of pone'bo emocional y continuamente ta sorprende'bo.